



O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IULAI 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O Tupulaga Talavou o se Meaalofa taua mai le Atua mo le lumana'i o le Ekalesia

Pepa mo le Fono Tele 2014
Saunia e Tupulaga Talavou
Matagaluega a Manukau
Niu Sila

“O le faamamafa o leni pepa....o se faafitauli ua tulai mai....o le faamavae lea o alo ma fanau o tupulaga a le EFKS ma ua o lolotu i isi lotu poo le le lolotu foi.”

O le mafuaaga o le pese:
“So Send I You:

faaauau itulau e 8

E le Mana'omia e Agelu ni Vae e Felelei ai!

E iai le lalolagi o tagata ola ma le lalolagi o tagata oti a o le alalau papa e fesoota'i ai o le alofa.

- Thornton Wilder
silasila itulau e 12

Ua saunia e le Matagaluega a Manukau le pepa, mo tupulaga talavou mo leni tausaga, ina ia taumafai e faamamafa atili ai le

faatauaina o tupulaga talavou, i totonu o le Ekalesia i fafo o Samoa. O se vaaiga mai tupulaga e
faaauau itulau e 2



Nisi o Mafuaaga o le Faaitiitia o Tagata o le EFKS

E FA PEPA: o le Pepa mai le Mafutaga a le Matagaluega a Apia Sisifo i le 1994; o le Pepa mai le Mafutaga i Malua a Faifeau ma A'oa'o Tausinuu i le 2012; o le Pepa a Tupulaga Talavou mai le Matagaluega a Manukau, Niu Sila, na fofogaina i le Fono Tele 2014; ma le Pepa na saunia mo le Fono T/ele 2014 e le Tiakono Toeaina o le Matagaluega a Aukilani. O ia pepa uma oloo faaali ai ni finagalo o i latou na faia ia pepa e uiga i le liu lotu o nisi o le Ekalesia Faapotopotoga Kerisiano Samoa. Ua lomua atu i le Sulu Samoa ona e aoga mo le fetufaa'iga o finagalo i lea mataupu.

O Tupulaga Talavou o se Meaalofa taua mai le Atua mo le lumana'i o le Ekalesia

le'i fananau ma ola i Samoa nei.

E moni lava, oloo ola ma mautu le Ekalesia EFKS i Niu Sila. A o le faamamafa o lenei pepa e faatatau i le faafitauli oloo tupu pea i totonu o le li'o o tupulaga i atunuu i fafo o Samoa. O se faafitauli ua tula'i mai ma le malosi, ma oloo iai foi le talitonuga, oloo tupu foi i isi atunuu i fafo o Samoa: O le faamavae o alo ma fanau o tupulaga a le EFKS ma ua o lolotu i isi lotu poo le le lolotu foi.

A o le fesili taua mo i tatou, poo iai se faafitauli i totonu o le Ekalesia EFKS ua ala ai ona faamavae aloaia ai tupulaga ia? Poo iai foi se fofo a le EFKS e mafai ai ona fofo le faafitauli lea. Aua oloo fai pea le galuega mae'ae'a a le Ekalesia, o le faagaioia mo le aga'i i luma o tupulaga talavou e ala i A'oga Aso Sa, Autalavou Laiti, ma isi lala o le Ekalesia e pei o le Au Taumafai, ma le Au Leoleo. E le o faatamala lava le Ekalesia. Ma o nei faafitauli oloo tutupu pea i totonu o Ekalesia i atunuu i fafo o Samoa.

Tupulaga:

E le faigofie lava i se manatu ona taliagofie le faamavae poo le o ese o tupulaga mai le EFKS a o se mea ua leva ona tupu ma oloo tupu pea e oo mai lava i lenei aso.

Ona e le tutusa aulotu, e le mafai foi ona faatatauina le pepa lenei i se aulotu se tasi, ae o le a faatatau pea i le aotelega o tupulaga i Aukilani e tusa ai ma suesuega.

I le tausaga e 2006 ma le 2013 sa faitauina e le malo i Niu Sila le aofa'iga o tupulaga sa fananau i Niu Sila oloo malamalama pea i le gagana Samoa. O i latou uma sa fananau i Niu Sila, na o le pasene

e le malamalama i le aganuu faa-Samoa. O lona uiga i le tausaga e 2006 e aga'i i le tausaga e 2013 ua manino lava i suesuega a le malo o Niu Sila, e iai le faafitauli ua tula'i mai i tupulaga talavou. Afai e le malamalama le 50 pasene o le aofaiga atoa o tupulaga talavou i le gagana Samoa, o lona uiga, o le pasene foi lena e le malamalama i le ata atoa o le Ekalesia. Aua e o faatasi le aganuu ma le lotu.

E faigata lava i tupulaga sa fananau i Niu Sila ona malamalama i le aganuu ona e le'i maua e i latou le avanoa e vaavaai ma faalogologo ai i le olaga faa-Samoa e pei o tupulaga oloo nonofo ma ola pea i Samoa.

E taua le itu faaleagaga poo le itu faaleaganuu?

E iai le manatu, e faapenei le tele o mafaufauga o tupulaga talavou i nei ona po, ma oloo amata foi ona faafesiligia le Ekalesia poo le a le itu e sili ona taua ona faamamamfa i le Ekalesia - o le itu faaleagaga poo le itu faaleaganuu.

E manino ma oloo atagia lava i le fesili lava lea - o le le malamalama o tupulaga talavou i le Faavae o le Ekalesia, ma le tala faasolopito o le Ekalesia. E malu le Ekalesia i le aganuu; e malu foi le aganuu i le Ekalesia. E o faatasi mea ia e lua. E faigata ona malamalama lelei le tupulaga talavou i Niu Sila i lenei mea ona o le atunuu i ona tu ma aga na soifua mai ai latou i Niu Sila sa leai se faamamafa i le faa-Samoa.

Oloo faamatala mai i le tusi a le tama'ita'i foma'i o Melani Anae, le faamatalaga a le isi tama matua na faasoa atu i le mataupu lava lea

e ala i le faa-Samoa i totonu o le Ekalesia.

O le faamatalaga e faapea:

'Ou te talitonu, ona o i latou sa fananau ma aoga i Niu Sila, e le tele so latou malamalama i le aganuu ma le faa-Samoa, ma e le malamalama atoatoa foi i le Ekalesia e pei o i latou sa fananau i Samoa. E i'u lava ina faaleaga e i latou le mea ua uma ona faavaeina. O le tele lava o tagata ua amata ona lau le sese o le faa-Samoa, ma le le aoga o le faa-Samoa, ma ua amata foi ona mulimulita'i ai a matou fanau, aua e faigofie ia i latou ona faataatia le faa-Samoa ma mea e tatau ona fai i totonu o le Ekalesia. O se faata'ita'iga, o lafoga. A o le mea e le malamalama ai alo ma fanau sa fananau i Niu Sila, o le mea tonu lava lena oloo maua'a ai le faatuatua o tagata lotu i le lotu ma le Ekalesia - le galulue faatasi mo se faamoemoe e tasi.'

O le faafitauli o tupulaga talavou i nei ona po, o le le malamalama ae le o le teena o le EFKS. O le le malamalama i le taua ma le aoga o le lotu faatasi ai ma le aganuu faa-Samoa. O lona uiga, oloo iai pea le ala e mafai ai ona fofo le faafitauli lea pe afai ua malamalama lelei alo ma fanau ma tupulaga talavou i le taua o le fealofaniga a le lotu ma le aganuu.

O le meaalofa a le Atua mo le Ekalesia

Oloo faamatalaina i le Evagelia na faamauina e Ioane le taua o le alofa. O le alofa o le Atua Silisiliese mo i tatou uma. Ma o lea ua faaagaina foi le mataupu e 15 fuaiupu e 13 e fai ma ta'iala mo i tatou uma i le Fono Tele i lenei tausaga. E leai lava se isi i lenei lalolagi atoa e le oo atu iai le 'a'ao alofa ma le 'a'ao agalelei o lo tatou Matai Sili. Ua molimauina foi i lenei Fono Tele ma lenei faapotopotoga le alofa o le Atua

faaauau itulau e 5

O LE LAUGA

Tusi Faitau: FT: Isaia 6:1-8

FF: Ioane 16:33

Matua: Isaia 6: 8b: Ona ou faapea atu ai lea, o a'u lenei, ina auina atu a'u.

Manatu Autu: O FAIVA ESEESE, AEMAISE LE GALUEGA FAAFAIFEAU, E AO LAVA INA A'E MANUMALO.

Soo se tofiga poo se faiva e valaauina iai i tatou, e le aunoa lava ma le tapuaiga a o tatou tama, ma nai o tatou aiga. O le latou tapuaiga lea e taua tele, aua o loo latou taputapua'i ma tu'i le mulipapaga, ma le faanaunauga e tasi, ia a'e manumalo o tatou faiva eseese. I le faifeau lava ia ma lona to'alua, o taulaga soifua ia a le aiga ua ofoina atu mo le Atua.

O le fesaga'iga a Isaia ma le paia silisiliese o le Atua, i totonu o le malumalu, ua iloa ai e Isaia, e le mafai e se tagata e faa'afa'afa lona olaga, ona faia le galuega a le Atua. Le tagata e faia le amioleaga ma le ola agasala.

Ina ua ta'utino e Isaia, o ia o le tagata agasala; ma pa'i atu iai le faamagaloga a le Atua i lona tagata tuai; ua ia lagona ai loa, lona faapa'iaina mo le galuega. Ma ua manino ai le vaai a le perofeta, o le Atua e a'e manumalo ai lana galuega, e ala i le maua'a o lona faatuatua i lana Afio. E le'i pine lava ona pa'i atu le faamagaloga a le Atua, ma lagona lona faapa'iaina, ae faalogoina loa e Isaia le i'uleo: "O ai ou te auina atu?" Tali atu loa: "O a'u, ina auina atu a'u."

Ou te faaupuina le soifua galue o Isaia - O LE ALU E FAI LE GALUEGA E AUNOA MA LE FAA'AF'AFA. E mafua ona ou faaupuina faapea, ona o le tele o tala o lana galuega faaperofeta i totonu o lana tusi, na lavea'iina ai e Isaia le nuu o Sa Iuta.

Pei la o le 'au'aufau faatasi o Resina le tupu o Suria, ma Peka le

tupu o Isaraelu le malo i matu; e osofia ma faaumatia Iuta le malo i saute lea e galue ai Isaia. Ua vevesi ma atuavale tagata uma o Iuta e aafia ai ma Aasa le tupu. Ae to'a lelei lava Isaia ma fai mai ia Sa Iuta: Aua le popole i ia malo e lua ma o la tupu. Ua na o ni i'u'aulama e lua, na ona pupusa ae leai se afi o iai. Ia, na te'i a ua solofa ifo lea taupulepulega ae leai se mea a Sa Iuta na faia iai.

O mea la faapena, ona pau lea o le ituiga o tagata e mafai ona faafeto'aia. Tagata e loloto le faatuatua e pei o Isaia. O le tagata e maua'a lona faatuatua i le Paia Silisiliese o le Atua, lea na ia vaaia i le malumalu. O le talitonuga la lea o Isaia i le paia silisiliese le 'auaoa lea na faaali ia te ia, e le Atua lava, i le malumalu. O iina foi na manino ai Isaia ma le atoatoa - o le Atua ua valaau mai, e le masani i ni mea faa'afa'afa.

Afai la e maofa tagata o lona nuu i le faatinoga o le galuega faaperofeta a Isaia, e sala ina faapena. Aua ua iloa lelei lava e Isaia i le valaau ua oo mai. O le mea tonu lea na faapa'ia ai o ia e le Atua, ma auina mai le serafi ma le malala ola, e susunu ai ana agasala ma le olaga tuai sa ola ai.

A silasila foi i le gagana o lana galuega faaperofeta, o le suafa lava lea na ia fiafia e faaoga i le Atua - "O LE PA'IA O ISARAELU". Pei la o le manulauti lea o lona olaga faaperofeta - o le folafola i tagata uma, o ai lava le Iutaia, pe tupu, pe ositaulaga, pe perofeta, pe auauna i le malumalu. Poo le a lava le tofi e tofia iai le tagata, o le 'a le manuia, pe 'a aunoa ma le maua'a o lona faatuatua i le paia o le Atua na valaau mai.

O le saunoaga lea a Iesu i lona tagi talatala i le Mauga o Olive - "Ierusalem e, Ierusalem e, o le fasiotia perofeta....." Sa saunoa lava Iesu ma lona silafia lelei o le

talatuu e faapea - O Isaia le isi perofeta na fasiotia i Ierusalem. Fai mai na ililua e ona fili, ae le solomuli lona faatuatua faaperofeta. Aua o Isaia e le na o se perofeta. A o le perofeta ua matua talitonu i lona faapa'iaina, mo le finagalo pa'ia o le Atua.

O le valaau e Iesu o ona soo, e leai lava se isi faamoemoe e ese i lona finagalo. Na o lenei: ia maua'a lo latou faatuatua i le na valaauina i latou. Ina ia o atu ma le faamaoni, ma ia tumau i lo latou faapa'iaina ma le valaauina.

A o faamalumu mai lo latou taimi taumavae, fai mai Iesu, "E maua foi outou e le puapuaga i le lalolagi, a ia outou loto tetele, ua ou manumalo i le lalolagi."

E le'i finagalo Iesu e o ona soo e ta'oto'oto i le galuega, pe o e eva, pe o foi e to'ilalo. E leai. A lea e manino lava lana saunoaga - "Ia outou loto tetele, ua ou manumalo i le lalolagi."

O le uiga moni lena o le satauro ua tuufua o Keriso - O LE MANUMALO.

Ua outou tagataga'i ma tatou vaavaai i nei aso. A leai ni tala e aafia ai ni faifeau pa'u'u i le inupia, mulilua, ma le tele o isi amioga leaga, ua leai ni tala a le TV, leitio, aemaise ua tau le taulia nusipepa. Ua le a'e manumalo faatamasoaliiga mo le Atua. Aisea ua faapea ai faifeau? O le tali: o aso nei ua le paia o tatou olaga. Ua le moni lo tatou alofa i le Atua e ana le galuega. Ua faapena foi lo tatou le alolofa moni i o tatou tuua, ma aiga, oloo tapua'i mai, ma tu'i le mulipapaga. Ina ia a'e malo o tatou faia.

O le faala'ei'au a le failauga o le Sulu mo lenei masina: tatou punoua'i ma le faamalolosi i o tatou faiva eseese. Ma taula pea le silasila ia Iesu, o le na te ta'ita'iina ma faa'ato'atoaina lo tatou faatuatua. I le Suafa o Iesu. Amene.

Petaia Lokeni FS

EFKS Magele Sisifo

O Tupulaga Talavou o se Meaalofa taua mai le Atua mo le lumana'i o le Ekalesia

mo leni Ekalesia ua tupu ma ua ola ma le manuia.

E iai le fuaiupu o le pese a Malua e amata faapea: "E o mai tupulaga ma alu, ae tusaafia pea Malua i so'u manatu." E le gata e manaia le fati, ae uiga loloto foi le faaupuga. E mafai ona faauigaina faapea - e taua se galuega ae faaauauina. E faasolo mai tupulaga ma mavae atu, ae tumau pea le mamalu o le Laumua. O le meaalofa a le Atua mo leni Ekalesia. E faagasolo lava tupulaga, ae tumau pea le Ekalesia e faaauauina e isi tupulaga fou oloo gasolo mai i le lumana'i.

Oloo faamamafa e le Tusi faitau ma le matua o le autu a le Fono Tele le upu lea o le alofa. O le upu alofa i le gagana Eleni, e fa vaega e vaevae ai pe a faamatalaina lona uiga.

1. Storge - o le alofa faaleaiga - e pei o le alofa o matua i fanau.

2. Philia - o le alofa faalemafaufau - o se faataitaiga e faapea - afai e te alofa mai ia te a'u, ou te alofa foi ia te oe.

3. Eros - O le alofa faaletino - e pei o le alofa i le va o se tama ma le teine.

4. Agape - O le alofa faaleagaga - o le alofa tunoa oloo faamamafaina i le Evagelia a Ioane 15:13.

Fai mai le fuaiupu e 13: "E le sili lava le alofa o se tasi i leni alofa, ia tuuina atu e se tasi lona ola mo ana uo." O se faata'ita'iga taua leni ma se lu'itau ma se faamanatu taua leni mo le Ekalesia - o le alofa e le faatua'oa.

Oloo faamatala mai e le Tusi faitau i le Ioane le matagofie ma le taua o le ofoina atu o le ola o se tasi mo le isi uso a tagata. Ua foa'iina mai e le Atua le meaalofa lea mo i tatou e ala i le ola e pei ona aumai ai i le Tusi o Kenese 1: 26.

O lona uiga - o le ofoina o lou ola e puipui ai le meaalofa taua lea na foaiina mai e le Atua mo i tatou. O le alofa sili lea oloo faamamafaina i le Evagelia, ma o le alofa tunoa lava lea ua faasino mai e le Atua mo le tatou Ekalesia. Ole alofa e le uma pe mavae; o le alofa e leai sona gataaga, o le alofa faifai pea, o se alofa e faaauauina se'ia oo i le faavavau.

A o le fesili, pe faapefea ona auala mai leni alofa faaauauina a le Atua mo le tatou Ekalesia? Ina ia tupu ma ola pea le Ekalesia i le lumana'i?

E auala mai e ala i tupulaga talavou, o le meaalofa lea a le Atua mo le Ekalesia ina ia susulu pea le lamema ma ia faaauauina le galuega matagofie a e sa mua i malae. A tausia lelei le tupulaga talavou, e fua tele mai e pei o se laau aoga ona manuia ai lea o le Ekalesia i le lumana'i. E tele lava auala e ala mai ai le alofa tunoa o le Atua, a o le auala lava lea oloo faamamafaina i leni pepa mo tupulaga ma le Ekalesia: Ia ofoina atu o tatou ola mo le isi uso a tagata ia tupu ma ola le Ekalesia.

E faapefea ona ofoina mai le ola o le Ekalesia mo ana tupulaga?

Tupulaga mo le lumana'i

E ui lava oloo tula'i mai pea le faafitauli lea i le tele o tupulaga, oloo iai pea tupulaga oloo to'a'aga i le lotu ma oloo saili foi le

malamalama i le faa-Samoa, ina ia o latou malamalama atili i mea e fai a le Ekalesia ma lona taua i le lumana'i.

O le aganuu lava mai le amataga faapea foi le lotu e le mafai ona tatou tuua eseese. Tasi lea tautua e mausali ai le galuega a le Atua. O le tuu iai ma le aganuu, aua o le 'i'oimata lena o le Samoa o lana aganuu, e leai se mea oi sili. Tatou galulue ma le fiafia, e leai lava se mea e lilo i le Alii. O lana Afio e aumaia le potu e te malamalama ai i soo se mea. Pe sa e soifua a'e i Niu Sila poo Samoa e leai lava se mea e faigata i le Alii.

Le mamalu e o le Fono Tele, o a ni foliga o le Ekalesia i le lumana'i pe afai oloo tatou faamoemoe i tupulaga o nei ona po? Fai mai le ulutala o le palakalafa - "O tupulaga o le lumana'i o le Ekalesia." Ae o se taofi e faapea - "O tupulaga e le o le lumana'i lea o le Ekalesia." "O i latou ia o le Ekalesia."

E faamoemoe le lumana'i o le Ekalesia i ana tupulaga i le taimi nei. O le fatu e te totoina nei e fua mai a taeao. Oloo nofo fale ia Sa Tuiamaa le taunuu mai o le Tala Lelei i o tatou laufanua.. Le mafuaaga lea o le Taeao nai Mataniu Feagai ma le Ata ma nisi taeao ua lau silafia. Sa taulamua pea le Ekalesia i le tele o galuega e oo lava ile faavaeina o le Maluapapa ina ia fofoa ma a'oa'oina ai ni faifeau ma ni misionare talavou aua le galuega tala'i faapei ona fetalai o le Alii, "Ia outou o atu e fai nuu uma lava ma soo."

Le galuega lea sa tauasa mai e o tatou tuua mai le amataga leni ua tatou 'ae'ae ai. O lou taimi leni tatou te faaauau ai galuega ua mae'a ona tapenaina ma faaoga le tomai ma le agavaa e afuafua ai nisi galuega fou mo le Ekalesia ma ona tupulaga. Atonu o se lu'i lea mo i tatou uma aua le EFKS mo le lumana'i.

Tupulage e, o le fatu lena o le Ekalesia ua i ou aao. E leai se mea e tatau ona toe nenefu i lou silafia aua ua oo i lou taimi. Aua nei faoa e se isi lou faatuatua ma lou talitonuga i lau Ekalesia, uu mau lou pale o le ola, o le Atua lava na ia aumaia.

Ia manuia le Fono Tele.

O nisi nei o Mafuaaga o le Faaitiitia o Tagata o le EFKS

(O se Pepa mai le Mafutaga Faafouina a Faifeau ma A'oa'o Tausinuu - Malua - 27-31 Aokuso 2012)

**Saunia e
Aukilani Tui'ai FS,
Faiaoga
Kolisi Faafaifeau i
Malua**

O le autu o lenei pepa talafaasolopito, o le suesueina o nisi o mafuaaga o le faaitiitia o le faitau aofa'i o tagata o le Ekalesia (EFKS) mai le 1991 e oo i le tausaga 2001.

Sa tele le pa'u o le faitau aofa'i o tagata o le EFKS mai le tausaga 1991 e oo i le 2001. I le tausaga 1991 e 43% tagata Samoa poo le faitau aofa'i e 68,651 tagata lotu o le EFKS. I le tausaga 2001, ua pa'u le faitau aofa'i o tagata lotu EFKS i le 35% poo le 61,413 tagata lotu.

O le vai taimi lea ua tele ni suiga o tulaga o Ekalesia i totonu o Samoa. Ua lolofi mai le tele o tapua'iga eseese. Ua faapena foi ona maitauina le faaitiitia, o le faitau aofa'i o tagata lotu o lotu tetele i Samoa, e pei o le Katoliko ma le Metotisi, ae sili lava le pa'u o le faitau aofa'i o tagata lotu EFKS. O le lotu Katoliko sa pa'u mai le 21% i le 20% i le vai taimi. O le Metotisi sa pa'u mai le 17% i le 15%. A o le suiga tele ua vaiaia, o le siitia i luga o le pasene o lotu 'laiti', e pei o le lotu Mamona aemaise le lotu Patipati, poo le Assembly of God. Sa siitia le faitau aofa'i o tagata lotu Mamona

mai le 10% (16,394) i le tausaga 1991, i le 13% (22,521) i le tausaga 2001. Sa faapena foi le aofa'i o le lotu Patipati, ae peita'i ua faaluaina, mai le 3% (sili atu i le 3,000 tagata lotu) i le 1991 e oo i le 7% (11,742) i le tausaga 2001.

Sa faigofie ona liliu tagata i le lotu Mamona i Apia, aua sa sili atu tulaga o a'oga a le lotu Mamona. O se faata'ita'iga, o le Kolisi i Pesega sa sili atu lona tulaga nai lo a'oga a le EFKS. Sa maitauina foi le tele o tagata ua liliu atu i le lotu Patipati, aua e le faamamafaina le faiga taulaga e lenei lotu.

O le tasi mafuaaga ua liliu ai tagata mai le EFKS, ona o le faiga taulaga. O le suesuega a se tasi o faiaoga o le Mataupu Silisili e suafa ia Manfred Ernst i le tausaga 1994, ua ia molimauina ai i lana tusi o le "Winds of Change", e faapea:

Ua silafia e le toatele o tagata aemaise ta'ita'i o le Ekalesia, o le faiga taulaga a le Ekalesia o le tasi lea o mafuaaga ua faaitiitia ai le aofa'i o tagata lotu o le EFKS. Talu ai ona o le ola faatautava o aiga ma nuu, o le mafuaaga lea ua siisii ai i luga faiga taulaga i lea tausaga ma lea tausaga. O le isi mafuaaga ua taugata ai le soifuaga i lea vai taimi, ona o le lega sa aafia ai faatoaga talo i Samoa. O talo o se taumafa taua mo tagata Samoa, sa fesoasoani tele i le atinaeina o le Malo e ala i fefaataua'iga i atunuu i fafo (exports). Na amata ai loa ona faaoga falaoa mata ma alaisa ma nisi taumafa e auina mai atunuu i fafo. O le faaogaina o nei taumata ua faaopoopo ai ma

aitalafu a le Malo pe lata i le \$177 miliona. O le faaopoopo ai o le VAGST i le 1994, ua atili ai ona taugata le soifuaga mo tagata. Atonu o nisi nei o mafuaaga ua liu lotu ai tagata i le lotu Patipati, aua e le faamamafa e lenei lotu, le faiga taulaga e pei ona faia e le EFKS.

I le vai taimi foi lea, ua lolofi mai ai le tele o tapua'iga fou e ese mai le lotu Mamona ma le lotu Aso Fitu e pei o le Worship Centre, Full Gospel, A'oga Tusi Paia ma isi foi tapua'iga fou. O nei lotu fou, sa siitia ai le pasene o tagata lotu o nei tapua'iga mai le 6% i le tausaga 1991, e oo i le 14% i le tausaga e 2001. A o le toatele lava o nei lotu fou, sa sili ai lava le faitau aofa'i o le lotu Patipati. O le talitonuga o Tavita Pagaialii, o le faifeau ma se tasi o faiaoga o le lotu Patipati e faapea:

"O le sini autu o la matou tapua'iga, o le momoli o le feau poo le tala'i atu i tagata (outreach) i nofoaga faitele e pei o le maketi. O nisi auala sa faaoga e le lotu Patipati, o le tala'i atu e ala i polokalame i luga o le TV faapea ma le leitio faasalalau. O auala nei e tusa ma le mau a Pagaialii, ua mafua ai ona toatele tagata ua liliu atu i le lotu Patipati. Ae le gata i lea, ae ua faaopoopo foi a latou Aoga Tusi Paia e lua, o le Harvest Bible College ma le Ierusalem Fou Bible College. O lona uiga, e toatele tagata lautele oloo mana'omia le aoaoina ma se malamalama'aga i le Tusi Paia.

O le Mamona foi sa faataua tagata lautele (laity). Sa tapena foi e lea Ekalesia polokalame e fesoasoani ai i tagata lautele. I le

faaauau itulau e 9

MATINI LUTERU

1483 - 1546

O le Auupega o le Toe Fuata'i

O se Faatonuga mai le Anitikeriso

Na fai atu Feterika ia Katinale Tomasi, e leai se mea e ala ai ona pu'eina Matini ma ave i Roma.

O lea faaaliga a Feterika na le toe manofonofo ai loa Katinale Tomasi. Ua amata galulue faatasi nei ma isi e teteie ia Matini, e saunia se tusi mai le pope o le a tolaulau mai ai se finagalo o le pope e uiga i le totogiina o agasala. O le taimi lava e sainia ai e le pope lea tusi, ona ono tuua'iina ai loa lea o Matini i lona faasalalauina o ni talitonuga e ese mai talitonuga o le Ekalesia, aua o ona talitonuga e 95 ia na tu'itu'i i le faitotoa o le malumalu, na ia fesiligia ai le tonu o le totogi tupe o agasala e pei ona talitonu iai le Ekalesia. Na maua e Matini se kopi o lea tusi ia Oketopa 1520. Na ia faaigoaina o le "tusi matua leaga". Ona o lea tusi, na amata ai loa ona susunuina tusi (books) a Matini i Roma, Kolone, ma isi aai tetele. Ua faatonuina nei Matini ina ia faafo'i ona talitonuga a o le'i atoa aso e 60. Na tuua'ia e Matini i latou na faia lea tusi ma fai mai a ia:

O oe, Leo X, ma outou katinale, ma soo se tasi lava oloo outou 'au'au faatasi. Ou te lu'iina outou ma 'ou fai atu a o pupula mai o outou mata, afai ua auina atu lenei tusi oloo outou saini ai faatasi ma lo outou malamalama lelei iai, ou te lapata'i atu ia te outou, i le malosi o ia te a'u, e pei ona maua foi e isi Kerisiano e ala i le Papatisoga, ina ia outou 'alo ese ma ia mea faa-satani ma outou salamo, ma ia outou faia nei loa. Afai tou te le faia, ia outou silafia

lelei, o a'u, ma i latou uma e tapuai ia Keriso, o le a matou talitonu, o le Nofaalii i Roma ua nofoia e Satani, ma ua ave ma nofoalii o le Anitikeriso, ma o le a ou le toe usitai iai, ona o ia o se fili mata'utia o Keriso. A faaauau pea lo outou ma'ema'ea, o le a ou lafoa'i outou ia Satani, faatasi ma lenei tusi ina ia faaumatia ai o outou tagata faaletino, ina ia maua ai so outou lavea'iga faatasi ma matou i le Aso o le Alii. I le Suafa o le ua outou faasauaina, Iesu Keriso, lo matou Alii. Na mana lava Luteru ina ia lauiloa e tagata i Uitenipeka e le aafia o ia i tuua'iga ia ua fai faasaga mai ia te ia. O lona faafesaga'i pea ma faitioga ma le 'ino'ino mai o le lotu, na maua ai e ia le lotu tele ma le toa e fai atu ai faapea:

E le 'au ma a'u soo se tagata lava na te lagolagoina le tusi na saini ai le pope. Ona o le alofa tunoa o le Atua ua ou sa'oloto ai, ma e le mafai e lenei tusi ona faamata'u mai ia te au. Ou te iloa lelei lava le mea e pupuna mai ai lo'u malosi, ma le oloo faamalumalu mai ia te a'u i luma o tagata ma le tevelo. Ou te faia le mea ou te talitonu e sa'o. O tagata ta'ito'atasi uma lava e tutula'i uma ma tali mo ia lava pe a oo mai le oti ma le Aso Gataaga, ona faato'a manatua ai lea o la'u lapata'iga na fai ma le faamaoni.

O le Tafuna'i Pa'ia

E atoa ane aso e 60 na tuu mai e faafo'i ai talitonuga o Matini Luteru, e le'i faafo'ia lava. A ua ia susunu le kopi o le tusi na aumai faatasi ma tulafono uma, lea e faatonutonuina ai le Ekalesia Katoliko Roma mai le amataga o

le talafaasolopito o le Ekalesia.

Fai mai nisi, o le Tafuna'i Pa'ia lea, o le amataga tonu lea o le Toe Fuata'iga, *Reformation*, ae le o talitonuga e 95 o Matini Luteru lea na tu'itu'i i le faitotoa o le malumalu.

O le Tafuna'i Pa'ia lea na fuafuaina mo le taeao o le aso 10 o Tesema. Na fai foi e Luteru le tusi valaaulia sa iai upu faapea: "O i latou uma e tutumau i le upu moni o le Tala Lelei, ia faatasi atu i le itula e iva i le taeao i le malumalu o le Satauro Pa'ia, o le a susunuina ai tusi uma o tulafono faale-pope ma isi talitonuga sese uma, e tusa ai ma talitonuga faaaposetolo mai anamua."

Na faatasi mai i lenei mea na fai, porofesa ma tagata a'o'oga i le iunivesite. Na amata lava ona lafo i le afi ia tusi tulafono. O se mea matuia tele lenei mea ua fai. Aua o tulafono a le Ekalesia, e mafai ona faatusatusa i le Talamuta a le lotu Iutaia, ma le Korani a tagata Isalama. O tusi tulafono ia o le Malo Faa-Kerisiano faa-Latina, oloo fausia mai ai le pulega o le Ekalesia. E tusa ai ma talitonuga i ia aso, o tulafono faale-lotu ia, e tulaga tutusa ma tulafono a le Atua.

Ina ua liu efuefu tulafono faale-lotu, ona faalatalata atu ai lea o Matini Luteru i le afi ma togi iai le tusi na faasalalauina mai e le pope ma fai ane:

"Ona ua e solia le mea moni mai le Atua, ia faapea foi ona aumai o oe e le Atua i le afi lea." Ona toe faapea ane lea o Matini Luteru, "Ona ua latou susunuina a'u tusi, o lea ou te susunuina ai foi a latou tusi." Ona foi ai lea o ia i le aai faatasi ma isi porofesa.

Ae nonofo ai pea tagata a'o'oga, ua faamalasia o latou tagata i nei mea ua tutupu. Mulimuli ona faamalalamalama lea e Matini Luteru ia i latou le uiga moni o mea ua ia faia i le Tafuna'i Pa'ia, ma mea e tatau ona latou fai ona o lea ua latou iloa le mea moni.

faaauau itulau e sosoo ai

O le pese a Hana ina ua fanau mai lana tama o Samuelu

“Ua olioli lava lo’u loto i le Alii; ua faamaualugaina lo’u nifo e le Alii; ua ou mautali ai i e ita mai, aua ou te fiafia i le olataga mai ia te oe.

“E leai se pa’ia e tusa ma le Alii; aua ua leai se tasi ua na o oe; e leai foi se papa e tusa ma lo tatou Atua.

“Soia tou te faatele a outou upu faamaualuga na’ua, e alu a’e ai le faa’ono’ono i o outou gutu; aua o

le Alii, o le Atua sisila mai o ia, o ia foi le na te fuatia amio.

“Ua gauia au’ufana a tagata malolosi; a o e na tautevateva, ua fusi o latou sulugatiti i le malosi.

“O e sa maooa, ua fai ma auauna i latou ia maua ai mea e ‘ai, a o e sa fia aai, ua mapu i latou; o le na pa ua i’u ina fanau mai se toafitu; a o ia ua toatele ana fanau, ua vaivai o ia.

“O le Alii na te fasioti, ma faaola; na te faaoo ifo i le tuugamau, ma faafoi a’e.

“O le Alii na te faamativaina, ma faatamaoagaina; o ia na te faamaualoina, ma faamaualugaina; na te faatula’iina

le tagata lautele nai le eleele, na te faaeaina foi le tagata mativa nai le faatafuna, ia nofo faatasi ma alii, ia fai foi mo latou tofi le nofoalii mamalu; aua oloo i le Alii faavae o le lalolagi, ua na faaee ai le atu laulau.

“E leoleo e ia o vae o ona tagata paia, ae faalologo tagata agasala i le pouliuli; aua e le malo le tagata i le malosi.

“O e ua finau i le Alii e faamomoina i latou, e faapa mai e ia le faititili mai le lagi i o latou luga, e pule le Alii i tulu’iga o le lalolagi; na te foai atu le malosi i lana tupu, e faamaualugaina foi e ia le nifo o le na ia faauuina.”

MATINI LUTERU

1483 - 1546

O le Auupega o le Toe Fuata’i

O le Malosi Faaleagaga

O tagata a’oga, e talavou ma mama i latou e latou te le iloa lelei uiga o mea ua tula’i mai, sa iai i latou e pei lava o nisi tamaiti a’oga, e iai a latou fu’a o faalelelelea, ma fe’ei foi ma alalaga.

E ui lava sa tumu i latou i lagona eseese faatalavou e ono le mataofiofia, a o le susunuina o tusi e le o se uiga finauvale, a o se faatinoina lava lea o se fouvalega. Ua pupula toto’a atu nei Matini Luteru i mata o le agaga o le lotu ma le le ‘emo ai, pe fo’i mai lona talitonuga. O le malosi moni lava lona o le tagata Fuata’i. O le agaga moni lava lona o se tagata na te iloa lelei lona tulaga ia Keriso, o se tasi na te iloa le mea o fai mai ai le Upu e uiga i le mea moni. O le malosi lea e tatau ona toe fo’i mai i le Ekalesia. O lenei malosi e le na o se meaalofa mai le Atua. O lenei malosi e tatau ona atia’e ma faatinoina e pei lava ona atia’e ma faatino le faatuatua. E faapefea ona e atia’e lenei malosi? I lou

faaaogaina lea atoatoa i lou tagata. Ae ou te le o fai atu ia faatino na o mea e te masani ai o le Tusi Paia. Ae ia e faaaogaina upu “faamanuia mai ia te a’u” ma “faasala a’u”, ma e tu malosi mo ia talitonuga. A oo ina e malamalama lelei i le Tusi Paia, ona e faamamaina ai lea o oe mai ni manatu e ese mai i Afioga a le Atua. A ulufia oe e ni manatu leaga, aua e te faalogo iai. Valaau leo tele - “Leai! e le o le mea moni lona o fetalai mai ai le Atua.” Tatalo ma atia’e lou tagata faaleagaga. Ia ifo lou mafaufau i le Upu ma fuafuaga a le Atua.

‘A ‘e faia o lea, e faasolosolo lava ona e atia’e lou malosi faaleagaga i totonu ia te oe. E faapei lava o le faamalosi tino. O le faamalosi tino e faamalosi ai musele o lou tino, ma puipuia ai foi oe mai ma’i. E faapena foi ona aoga mo lou agaga. O le a avea foi lea ma ala e te iloa lelei ai le mea moni ma le mea sese. E tele lava ina vaivai Kerisiano ona e galo ia i latou ona faamalosi tino faaleagaga. E vaivai a latou Ekalesia, aua e vaivai o latou ta’ita’i. E galo ia i latou ona atia’e le malosi moni i totonu ia i latou, le malosi e faamalieina ai, ma ta’ita’iina ai latou.

‘A ‘e atia’e se olaga faamalosi tino faaleagaga, e oo lava ina e tu ma’a’a ma le le fefe pe solomuli pe a feagai ai ma puapuaga, mafatiaga, maileiga, poo ni agaga leaga. O le a oo ina e tu poupu ma le le fefe e pei o Matini Luteru.

faaaauu i le Sulu o Aokuso

PRAYER: God is never more than a prayer from you..... We address and stamp a letter and send it on its way, confident that it will reach its destination, but we doubtfully wonder if our prayer will be heard by an ever-present God. Wonderful things can happen to us when we live expectantly, believe confidently, and pray affirmatively.....The pulse of prayer is praise. The heart of prayer is gratitude. The voice of prayer is obedience. The arm of prayer is service. --- *William A. Ward.*

O le Mafuaaga o le Pese:
“So Send I You”

O le mamao o se mea tuufua sa nofo toatasi ai, na misia ai lava e Edith Margaret Clarkson le mafutaga ma isi tagata Kerisiano. O ia o se faia’oga e 23 ona tausaga, i se nofoaga e eli ai le auro i matu o Onetario i Kanata. E matua mamao lava le mea ua nofo ai nei o ia mai lona aiga ma ana uo.

A o su’esu’e o ia i le tusi a Ioane 20:21 i se tasi afiafi, ae musumusuina o ia e le Atua e ala atu i le fasi fuaiupu - “E faapea foi

ona ou aauina atu outou.” Na toe mafaufau ai lea o ia, o le Atua lava na ia auina atu o ia i lenei mea tuufua. O lona uiga o le mea lava lea o le a fai ai lana galuega faa-misionare. Na faanatinati lava ona ia tusia i lalo ona mafaufauga, e fatu faapese, pe faa-solo. O lea solo na avea mulimuli ane ma se tasi o pese faa-misionare aupito sili ona lauiloa ma fialia i ai tagata o le senituri 20.

E tele ni tala ma ni solo na tusia

e Margaret Clarkson ma lolomiina i nusipepa ma mekasini faale-lotu pe mo a’oga foi. E silia i le 30 tausaga o auai o ia i mea tau a’oa’oga i Kanata.

Ona o se faaletonu i lona tino, na le mafai ai ona alu o ia i nisi atunuu e galue ai faa-misionare. Ae o ana tusitusiga, o ana solo faatasi ai ma le pese lenei, sa matua aoga lava lea i le galuega faa-misionare sa faia e isi tagata i nuu ese, o i latou lava ia sa tali atu i le valaau na tali i le Isaia 6: 8 “O a’u lenei, ina auina atu a’u.”

Oloo ua lolomi atu i lalo le pese: “So Send I You”:

So send I you to labor unrewarded, to serve unpaid, unloved, unsought, unknown,
to bear rebuke, to suffer scorn and scoffing-so send I you to toil for Me alone.

So send I you to bind the bruised and broken, o’er wand’ring souls to work, to weep, to wake,
to bear the burdens of a world a-weary - so send I you to suffer for My sake.

So send I you to loneliness and longing, with heart a-hung’ring for the loved and known,
forsaking home and kindred, friend and dear one - so send I you to know My love alone.

So send I you to leave your life’s ambition, to die to dear desire, self-will resign,
to labor long and love where men revile you - so send I you to lose your life in Mine.

So send I you to hearts made hard by hatred, to eyes made blind because they will not see,
to spend - tho it be blood - to spend and spare not - so send I you to taste of Calvary.

“As the Father hath sent Me, so send I you.”
mai le tusi: Amazing Grace
tusia e Kenneth W. Osbeck

Ekalesia poo le leai o se Ekalesia
“Church or no Church”

Tusi Faitau: II Korinito 6: 6-18
Ekalesia poo le leai o se Ekalesia.
“Church or no Church”

Ua toe faamanatu e Paulo perofeta ma le malumalu i le Feagaiga Tuai. O tupua e fai taliga ae le faalogo; e fai mata ae le vaai; e fai le atigipoo ae leai se mafaufau.

Ua toatele tagata le faatuatua ma le talitonu i le Atua ma le malosi o

lona mana e ala ia Iesu Keriso. Ua osofia pea e le alii o le lalolagi ma ana ‘au le ‘au faatuatua a le Alii ma ua to’ilalo ai. Ua tele tofotofoga ma faaosoosoga ua le mafai ai e le Ekalesia a le Alii ona faatumauina. Ma ua le mafai foi ona maua le malosi ona o le ola le fealofani o le Ekalesia ma ona tagata. Ua fevaevae’i le Ekalesia ma ua le mafai ona iai lona

maopoopoga.

Sa leiloa le tasi teineitiiti i le vao ona saili lea a ua le maua. Ona faia lea o le tonu ina ia uulima faatasi ma savavali, ona maua ai lea o le teine a ua tuai.

Ma’imau pe ana vave ona uulima faatasi ma o gatasitasi semanu ua leva ona maua.

E faapea foi le Ekalesia, a le galulue faatasi e le mafai lava ona maua le faamoemoe oloo i le Keriso.

Tuiletufuga Le Mamea Ropati
Taitaifono Komiti o Tupe

O nisi nei o Mafuaaga o le Faaititia o Tagata o le EFKS

faaiuga o afa o Ofa ma Valelia, sa molimauina ai le tele o mea taumafa ma lavalava ma isi meaalofa e tele, sa foa'i e lenei Ekalesia mo tagata lautele. Ua toatele nisi sa faagaetia i nei meaalofa e tele, ma ua tosina ai i latou i lenei tapua'iga. O lenei foi Ekalesia, e iai a latou fesoasoani e ala i Ofisa e saili ai galuega, vasega e aoaoina ai le tomai faakomepiuta, ma ofoina atu fesoasoani mo le au faifaatoaga.

A tatou toe tepa la i le EFKS ma mafuaaga ua faaititia ai le faitau aofa'i o tagata i lea vai taimi (1991-2001), ae siitia isi Ekalesia laiti, e mafai ona faapea:

E le'i faatauaina e le Ekalesia (EFKS) tagata lautele (laity). O nisi nei o pine faamau o lea mau:

1. O le taulaga o le Au Taumafai sa lafoina ina ia atia'e ai le ola faaleagaga o tagata lautele. I le vai taimi 1995-2001 sa faaoga le \$123,215 i tausaga taitasi mo penisione o faifeau ua malolo. I le tausaga 1994 sa talosaga ai le Matagaluega a Apia Sisifo mo se vaega tupe mai le taulaga a le 'Au Leoleo, e sauni ai tusitusiga faaleagaga mo tagata lautele. E le'i faataunuuna lea faamoemoe. I le tausaga foi lea sa talia ai e le Ekalesia le vaega tupe e \$20,000 mo resources mo A'oga Aso Sa. Ae peita'i, e lei taunuu foi lea faamoemoe.

2. I le tausaga 1997 sa faamavae ai le Matagaluega a To'elau mai le EFKS. O le Ekalesia To'elau sa avea ma itutino o le LMS/EFKS mai le tausaga 1860. Sa avea ma Matagaluega o

le EFKS i le tausaga 1986. I le tausaga 1988 sa talosaga To'elau mo se Ofisa o Aoga Kerisiano i totonu o To'elau. Sa teena e le Ekalesia lenei talosaga, ona e laitiiti le motu o To'elau.

3. O le Kolisi i Vaisigano poo le Congregational Senior College sa faatuina, ina ia mafai ona tuufaatasia vasega ono (Form Six) mai Kolisi maualuluga a le Ekalesia e pei o le Kolisi i Leulumoega, Nuuausala, Papauta ma Maluafofu. I le tausaga 1991 na o le to'afa tamaiti aoga mai le aofaiga e 157, sa mafai ona ulufale i le Iunivesite. I le tausaga na sosoo ai, na o le to'afa foi tamaiti mai le aofa'iga e 223 sa mafai ona ulufale i le Iunivesite. I le tausaga lona tolu (1993) sa iai le faaaitiauli. E toatele sa pasi le School Certificate, ae ua le fia aoga i Vaisigano, ae ua aga'i i le Kolisi o Samoa. O le tausaga foi lea sa faamavae ai faiaoga sa iai faailoga maualuluga. O nei faiaoga sa filifilia faapitoa, e ta'ita'i ma siitia le tulaga o aoga a le Ekalesia i se isi laasaga e sili atu. O le pine faamau lenei, e faailoa mai ai le le mafaia e le Ekalesia ona faaleleia totogi o faiaoga, ma taofi ai nei faiaoga sa filifilia faapitoa, mo le faaleleia ma siitia le tulaga o A'oga a le Ekalesia.

O le aotelega la o se manatu e faapea:

“Ua faatalale le Ekalesia ma tuulafoa'i tagata lautele, o nisi nei o mafuaaga, ua faaititia ai le faitau aofa'i o la tatou Ekalesia.

A tatou toe tepa tasi i manatu o

nisi sa galulue faamisionare e pei o Misi Teveli (Bruce Deverell), o se tasi o misionare sa galue i Samoa mai le 1958 i le 1972, oloo faapea mai ai:

“E le tatau i le faifeau ona faatalale pe faatamala i le aafiaga tau tupe o tagata ae fau le malumalu o le Atua. **(The pastor cannot neglect the economic situation of the people at the expense of building a church of God.)**

I le taimi umi sa galue ai Misi Teveli i Samoa, sa popole tele o ia ona o le eseese tele sa tula'i mai i le Ekalesia, i galuega faafaifeau ma galuega a tagata lautele e pei o le tiakono. O le uiga o lea faamatalaga a Misi Teveli, ua foliga mai o le itu faaleagaga, ua na o faifeau latou te faatinoina lea auaunaga. A o le itu faale-lalolagi, ua lafo lea i tiakono poo tagata lautele.

O le mau a Misi Teveli, o le itu faaletino o tagata lotu, e le o se tiute poo se matafaioi lea a faifeau. Sa iloa tonu lava e Misi Teveli le taunuuga o lana mau, e faatau e le Ekalesia na o le ola faaleagaga, ae tuulafoai mana'oga faaletino o tagata. O le popolega la o Misi Teveli, ua faamaonia mai i le 30 tausaga na sosoo ai, e pei ona faaalia i suesuega a Alec Thornton, o se tasi o alii suesue o tala faasolopito o le Sosaiete. Oloo faapea mai lea alii:

Ua tuulafoa'i ma faatalale Ekalesia tetele i Samoa, i aiga vaivai poo aiga oloo mafatia i itu tau seleni. Oloo toe faapea mai lea alii, e itiiti ma le lava

O le Galuega a le Ekalesia o Tagata

(Ni 'oto'otoga mai le Pepa mo le Mafutaga a le Matagaluega Apia Sisifo - Iulai 1994. Lomia i le tusi: "Ou te le Teena le Faifeau Fo'efa'i" - saunia e Afemata T. Apelu Aiavao - published by the Institute of Samoan Studies of the National University of Samoa - 2000)

*** Ua faaalua e nisi, e aua le popole i pasene pa'u o tagata o le Ekalesia. Aua o lea lava e sii i tausaga uma le pasene o le taulaga ma le alofa.

A o le fea e sili? O le taulaga tupe ma le alofa, poo le ola o le mamoe? E faapefea le faaaliga a se tasi o Taitaifono o le Ekalesia i se tausaga ua mamao atu i tua, le Susuga i le Faifeau Toeaina o Mila Sapolu. Na ia faaali e faapea, o le galuega a le Ekalesia o tagata? O le faaolaina o tagata? O le tausiga o tagata ma lo latou ola faaleagaga. Na faaali soo e le Susuga Mila Sapolu i le Ekalesia le mea lea.

O le mea tatau le fai o taulaga, aua o tupe ia e faaaogaina e le Ekalesia i lona atiinae; aemaise lava le a'oa'oina o ana tama fanau. O le mea tatau le fai o le alofa o le faifeau. Ou te le auai i le manatu sa faaalua i le tausaga ua mavae i se mafutaga na faia i Niu Sila, e silasila lea Ekalesia ua tuma'oti, pe le tatau ona tuu ia aua le toe faia taulaga, ma alofa o faifeau.

E tatau lava ona fai o taulaga ma alofa. Ae o le manatu, silasila lelei i le faaaogaina o taulaga, ma le faiga o le alofa i le faifeau. 'Aua lava ne'i iai se mea e ono 'upuia ai le mea lelei oloo fai. Aua ua tuu e faifeau ma o latou faletua o latou aiga, ae faafaletulu'ia ma aumau i le galuega, ona o le fia faaolaina o tatou ma le fia tausiga o tatou le fanau a le Atua.

*** Na toatele lava tagata o le Ekalesia na matua fiafia ina ua faaleleia le Kolisi o Maluafou ma le Kolisi o Papauta, aua ua vaai atu, ua tino lelei mai ni mea o alu iai

tupe o a latou taulaga.

Sa tele ni tausaga o pisa le Ekalesia poo fea o alu iai tupe o taulaga a o lea e leaga a'oga a le Ekalesia. Leaga ma totogi o faiaoga. Leaga atu ai ma le a'oa'oina o fanau a le Ekalesia. A o le faaleleia o le Kolisi o Maluafou, Kolisi i Papauta, Kolisi i Leulumoega Fou ma Tuasivi, ma le A'oga Maua'uga Tuufa'atasi i Vaisigano faapea ma le A'oga Tusiata ma Ta faatagata i Leulumoega, ua fiafia ai tagata o le Ekalesia i lo latou va foi ma isi Ekalesia, ua iai se mea e mitamita ai ona o a latou tupe ia e lafo i tausaga uma i faiga taulaga.

*** E fesili atu Iesu i ona soo pe fia i'a se'i fai ai se meaai a le motu o tagata ua fia aai ua leva le aso, ae fai mai na o le lua. Le iloa e le ausoo pe faapefea ona fafaga le motu o tagata i i'a e lua ma nai areto. Ae na fu'e i ato e sefulu ma le lua toe'aiga o le vavega na fai.

O le vavega lea e aoga e le na o le aulotu, ae mo le faifeau foi ia. E pei o le faifeau toeaina lea na ou taua i luga. E ui ina laitiiti lona alofa, ae le taumate, na ia atili silafia ai, faigata o soifua ai le toatele o lana aulotu. Aua e le na o ia e 'uti'uti tupe e maua. E lelei foi se'i silafia ai, le faigata o le tau posiposiina o nai tupe iti e tagata lima vaivai o lana aulotu, ma faaeteete ai i mea e fai e aafia ai le aulotu ma lo latou soifua i aso fai soo. E faatuputeleina ai foi lona faatuatua ma manatua ai pea, le vavega i areto e lima ma i'a e lua. E mafai lava ona fai e le Atua le vavega i le tama'i alofa e maua.

*** E le tatau ona tatou faitioina isi tagata tala'i faapea e lei o i Malua ma poo a mea latou te iloa i le Tusi Paia. Aua o le toatele o i latou na fananau atu i la tatou Ekalesia ma faafailele i lima o faifeau o la tatou Ekalesia ma o

faaaauau itulau e sosoo ai

O nisi nei o Mafuaaga o le Faaitiitia o Tagata o le EFKS

polokalame oloo ofoina atu e Ekalesia tetele i Samoa, mo le atina'eina o tagata lautele. O le galuega lea e manatu le Ekalesia, e le o sa latou matafaioi lea, a o le matafaioi tonu lea o aiga. O lona uiga, ia fesoasoani aiga i e o vaivai.

I le aotelega la o lenei suesuega e faapea:

"O le faaitiitia o le faitau aofa'i o tagata lotu EFKS mai le 1991 i

le 2001, o se tasi lava o mafuaaga o lenei faafitauli, ona ua faatalale le Ekalesia i le vaaiga o tagata lautele (laity). I le faaiuga foi o lenei vaitaimi, sa amata ai ona faia e le Kolisi Faafaifeau i Malua nei, mataupu silisili faalautele (theological outreach) i alalafaga ina ia tala'i ma avatu le feau o le Tala Lelei i tagata lautele. E iai le manatu sa amata ai i lea taimi ona taofiofi le tele o tagata ua liliu i isi tapua'iga.

O le Galuega a le Ekalesia o Tagata

latou faletua. A ua o ese. Na a'o'oga i o tatou faifeau, ma a'oa'o'ina lelei ai i le Tusi Paia. E mafai foi ona fai mai latou, e le'i aoga le Au Soo o Iesu i Malua poo Piula poo Moamoa, ae na o le tasi le mea sa popoto ai o le faifaiva ma fonofono masae o o latou upega. Sa amusia foi Kerisiano i ona po o le foafoaina mai o le Ekalesia, ma fai mai taitai o le lotu Iutaia poo a ni mea e iloa e tamaloloa e na o le fagotaina o i'a le mea latou te iloa. Ae se'i silasila la i e ua faaolaina ona o le galuega a le 'au faifaiva toaitiiti.

*** Tatou te faitio lava ma tatou fai mai poo a mea o laugaina e i latou i sauniga o fai nei i Apia, ae lei o i Malua. Ae o lea e tumutumu iai tagata, aemaise tupulaga, e faalogologo iai, ma sisiva ai, ma patipati ai, ma autalavou ai. O lea foi e matua toatele tatou ua o iai ma lolotu ai, ma faalogologo ai, ma punonou ai ma tatalo ai. O lea e tutumu le mau pasi oloo la'u mai ai tagata e o mai e lolotu ai i mea ua fai ai nei i Apia, i Aso Sa uma. Ae o lea lava tatou te faitio iai ae o le la e ola latou ae pe tatou. A o le mataupu oloo latou laugaina, e faavae foi i luga o le tele o mea tatou te talitonu iai. Aua na tutupu atu ia tatou.

*** A alu atu se faifeau e tafao atu i lo'u fale, a oloo fai sa'u saka, o fofoe a'u fa'i, ae alu atu nofo i le tuai ma valu a'u popo o le faalifu, ou te fai iai, 'Se lau Susuga tuu ai pea ou te faia.' Ae a le tuua, ona ou tuua lava lea na te valuina au popo. Ma toe avatu iai ma nisi popo. Ma ma talanoa, ma ma talie. E ono oo atu foi la ma talanoaga i

mataupu silisili o le faatuatuga.

Aisea ou te le taofia ai? Aua ou te talitonu, ua latalata mai lava le faifeau i lo'u tagata faatauvaava ona o lana mea lea ua fai. Ua sau i lo'u umukuka. Ua le popole i le apulupulua o ona lima i le fofoe'ega o a'u fa'i, ma namuasua i le asu o la'u afi. A ua fai lava, ona i lona manatu, o a'u o lana uo, o a'u o le tagata e tatau ona fesoasoani mai iai. O a'u o le tagata e taua ia te ia.

Ua susu mai o ia mai lona maota ma lona mamalu, ma ua sau e fofoe a'u fa'i apulupulua. Ua faamaulalo foi e ia o ia ona o lona alofa ia te au. E pei lava foi o lo'u Faaola, na afio mai ma fanau i le fale e momoe ma aai ai povi, ona o le fia fesoasoani ma faaolaina au. O ia foi na fai mai: "Aua na ou fia 'ai, na ou fia inu,....." na fai toatasi foi la'u saka ae te sau ma e fo'efa'i ai. E ui lava foi i lona pa'ia ma lona mamalu, o ia foi o le Alo o le Atua, ae na faapalapala lona limatusi, ina ia ola le fafine talitane; ina ia pupula mata o le tauaso. Na talanoa foi ma le fafine Samaria ae sa, ma maua ai e le fafine le vaipuna e puna i totonu ia te ia i le ola e faavavau. Ma tatia'i ai i le ala faguvai a le fafine ae alu tala'i le Faaola. Na tu'itu'i foi ona aao i fao e pei o ni laupapa, ona o a'u. Ma sunu'i lona fatu i le tao ona o a'u.

E le taumate o le a outou fai mai, "O oe la o le tagata le mafaufau. E te le iloa o le faifeau, o le faafeagaiga taulagi a le nuu; o le ao o faalupega?"

Ou te le popole iai. Aua na alu foi Iesu i le fale o Sakaio, ma la aai faatasi. Ou te le popole iai, aua o lo'u Alii lo'u Faaola, na afio mai i lo'u fale palapala i le lalolagi, ona o lona alofa ia te au. Na

malepelepe ai lona tagata pa'ia. Ona o le sailiga o a'u le mamoe agasala e tasi ua se. Le tagata faatauvaava lava o a'u, ae ua maliu ai le Alo pele e toatasi o le Atua, ina ia ou ola. Ina ia tatou ola.

*** Ia, pei lava ona ou fai atu i le amataga, i le fafine Papua na alu atu ma le mea'ai lelei i le Susuga Sulufa'iga Samasoni ma le faletua o Sisavaii e tali ai faifeau Samoa na o atu, ae avatu i le ipu ti'eti'e o tamaiti, ona i lona agaga, o le ipu aupito sili lea ma le lelei ia te ia. E faapena foi lo'u manatu.

Atonu e pa'opapa i la outou faafofoga, poo la outou faitau, la'u augani. Pe le lelei foi i la outou silasila, le ipu oloo avatu ai la'u mataupu, ae oloo faia ma lo'u agaga popole, ma lo'u alofa moni i le Ekalesia, ona o le pa'u pea i tusigaigoa o pasene o le faitau aofa'i o tagata e lolotu i la tatou Ekalesia.

Ua faia foi e tusa o le tofia o au, ou te faia lenei mataupu i le Mafutaga a le Matagaleuga, sei faatupu manatu i le Matagaluega ma le Ekalesia, ma fai ai se fuafuaga a le Ekalesia, i mamoe o leiloa.

*** O le Fono i Kanana Fou, Amerika Samoa i le tausaga e 1986, a Tina o Ekalesia Tuufaatasi a le Pasefika, na faaalai ai e se sui usufono iloga mai Samoa e faapea, e ala ona le ola le Ekalesia Faapotopotoga Kerisiano Samoa, ona o le le tala'i o ona tagata, e pei o le Mamona, e pei o le Aso Fitu, e pei o le Molimau a Ieova.

*** O le toatele o tagata oloo liu lotu, e toatele ia i latou e le lelei so latou aoga, o le tala lea a se faiaoga e poto i le mataupu o le soifuaga o tagata. E le lelei lo latou atiinae. O lona uiga foi la, e lima vaivai. E loto vaivai gofie pe a tele saoga mea faale-lotu. E faavaivai gofie. E solomuli gofie. E liu lotu gofie.#####

E I le Mana'omia e Agelu ni Vae e Felele ai!

I se tasi o a'u malaga i le laumua o Polani o Warsaw, na te'i ai le ta'ita'i o le matou 'au malaga e to'a 30 o nisi o tagata faigaluega i ofisa o amapasa ma hai komesina e auai i se faalapotopotoga faava o malo i San Mateo i Kalifonia, ina ua ou fai atu iai, matou te fia feiloa'i i tagata o le atunuu.

Fai mai lana tali, "Oi, o lona uiga tou te le fia matamata i ni malumalu tetele ma ni fale mataaga?" Ae na ou tali iai, "Leai, matou te fia feiloa'i i tagata o Polani."

Fai mai Ropati lo matou faasino malaga, "Se 'aue e te faaseea a'u. E le taumate e le o outou o ni Amerika. A le o lea, o outou o ni Kanata. E le o outou o ni Amerika O tagata Amerika e masani lava ona le fia feiloa'i i ni tagata. E tele lava ina matou matamata i ata tifaga e iai le Dynasty. E le fiafia tagata Amerika e feiloai i ni tagata lautele. Ta'u mai la ia a'u le mea moni. O outou o tagata Kanata pe Igilisi foi. A 'ea'?"

E faanoanoa lava i le faaaliga a le faasino malaga. Ae le pepelo Ropati. E umi se taimi o matou talanoa i ata e pei o le Dynasty, ma e moni lava, e toatele tagata Amerika e pei o latou ia i le ata tifaga lea ma isi. Ae toatele foi tagata Amerika e le faapea. Na i'u ina malie Ropati e ave matou i se mea e mafai ai ona matou feiloai atu i tagata lautele o le atunuu.

Na ave matou i le falema'i e faasolo iai ma'i o tagata matutua ua amata ona malolosi. O le loomatua aupito matua oloo iai e sili i le selau tausaga lona matua. Fai mai o ia o le purinise Rusia

a o le'i amata pulea faakomunisi le malo o Rusia. Ina ua matou feiloai, ona faasaga mai lea ma fai mai ana solo i le mau gagana e na te iloa. E ui lava e faale manino le lauina mai o isi ana solo, ae o ona uiga, ma ona foliga manaia, e pupula mai e ui lava o ia o se tagata ua matua matua lava. Ua musu e faamavae mai ia matou a ua mana'o e matou te talatalanoa pea.

Na matou faasolo asiasi i ma'i oloo iai i le falema'i, faatasi ma foma'i, tausima'i, ma nisi o le pulega o le falema'i. Na matou fusifusi ma talie ma i latou uma e to'a 85 o loomatutua uma. Sa valaau a'u e isi o Popa, ma manana'o ou te tago atu e fusi mai latou. Na maligi ou loimata ma ou fusia latou, e ui ina maanumini o latou tino, ae ese le manaia o o latou uiga fiafia. E le maanumini o latou uiga fiafia.

Peitai o le ma'i na matua faate'ia matou o le ma'i mulimuli. O le ma'i aupito laitiiti foi lea i le falema'i. O lona igoa o Oleka e 58 ona tausaga. Ua valu tausaga o nofo lava i lona moega ma e musu e alu ese ma le moega i lona potu na o ia lava. Talu lava ona oti lona to'alua ua le toe fia ola. O le fafine lenei, o se foma'i. Valu tausaga ua te'a na taumafai ai e pule i lona ola. Na oso i le ala o le nofoaafi alu ai le nofoaafi i ona vae e lua ma mumutu ai.

A o o'u vaavaai atu i lenei fafine, talofa! Le mamafa o ona tiga ma lona faanoanoa e le uma ona o le manatu pea i lona to'alua. Na po'ia ai foi a'u i le faanoanoa o le fafine, ma ou tootuli ifo i lalo, ma ou milimilia ona pitovae e lua, ma ou

sogi atu iai. Pei lava o faasoana a'u e se malosi e le mafai ona ou teena, ma ou talanoa atu iai i le gagana Peretania. Na musumusu mai se isi ia te au e malamalama le loomatua i le Igilisi. Ou te le manatua a'u tala na fai i le fafine, tasi o lea, o lo'u taumafai atu lea e fai iai ou te lagona lelei lava ona tiga ma lona misia o lona toalua. A o le mea e lelei pe a na faia, o le taumafai lea e faaoga puapuaga ua oo ia te ia, e auala atu ai sana fesoasoani mo i latou oi le falema'i. O le vai taimi lea faato'a ea mai Polani mai pulega sau faakomunisi. Pei lava ona mafatia ma puapuagatia lona atunuu ma o lea ua ea mai le pologa o faiga malo sa iai, e tatau foi ia ia ona ia faapea ona fai. E mana'omia e lona atunuu ni tagata e pei o ia na ui mai i puapuaga e tele.

Na ou fai iai e pei lava ia o le agelu na manu'a, ma o le upu Eleni angel, *angelos*, o lona uiga, "avefe'au o le alofa, auauna a le Atua." Na ou fai foi iai, e le mana'omia e agelu ni vae e felele ai.

O fetagisiga le mea na oo iai ina o le a matou faamavae. Ae ou te vaai atu i le mea o iai Oleka, o talotalo i le tamaloa e avatu le nofoa faataavale se'i sau ai. Ma tu mai lava i luga a ua le faatali se'i taunuu atu le nofoa.

O le faato'a alu ese lea o Oleka ma lona moega, talu mai tausaga e valu ua mavae!

tusia e Stan Dale

faamatalaina e

Afemata T. Apelu Aiavao

PRAYER:

Prayer becomes a flat and arduous business when we refuse to obey the leads and lights that God has given us. Prayer must be followed by the courage to act.

by Ernest T. Campbell

E Maua Manuia pe 'a 'e lelei i le Gagana Samoa

O se tala e lagolagoina ai le a'oa'oina lelei o le gagana Samoa - e faia'oga, ma tamaiti a'oga.

Sa ou a'oga i le A'oga a le Faifeau i Sogi, Apia. O le aulotu i Sogi sa tausia e le faifeau mai Elise (Tuvalu), o Moresi ma lona faletua o Saronā, o le Elise foi. O le ulugalii o lupe faalele a o la aiga i Elise mo le Tala Lelei. Na o mai a'oga i Malua, i'u mai ai. Ma o lo la nuu muamua lava lea o Sogi. O la'ua foi o le uluai faifeau o Sogi, sa tele ina ta'u e tagata i na aso, o Siamani, ona o ina sa iai le faletalimalo o le Casino Hotel na fausia i aso o pule Siamani i Samoa. O le faletalimalo lea sa fai ma ofisa tutotonu o Siamani i le Pasefika. O le faletalimalo foi lea sa fai ma ofisa autu o vaega'au a Amerika i Samoa i Sisifo i aso o le Taua Tele Lonalua a le Lalolagi 1939-1945, aua o Sogi o le isi lea o nofoaga o 'autau a Amerika i Samoa nei i ia aso.

O Moresi ma Saronā na la faavaeina le aulotu i Sogi i le tausaga e 1932. Na oo ina maluu ai lava Moresi i Sogi i le tausaga e 1964. A o le faletua ia Saronā, faato'a maluu i Niu Sila tusa o le 40 tausaga mulimuli ane ai.

O le a'oga lea a Moresi ma Saronā na faavae mai ai la'u

gagana Samoa. Na ou vasega "Faitau Pi" ai; ma faasolo atu ai i vasega e faaogaina ai le Tusi Oti. A o le mea e fai pea lava pea i le fale o le faifeau i lotu afiafi, o le faitauina o le Tusi Paia. E te faitau ina ia sa'o lelei lou ta'uina o upu, lou malolo i le koma ma le piriota. A sese lau faitau, ua faitau le isi tamaitiiti lea lua te sosoo.

Ua oo mai i nei aso ma ua pisa i le leaga o le gagana Samoa a tamaiti a'oga i Samoa, ma tau saili se vai fofo, ona ou manatua ai lea o le faifeau Elise lea. E le o ni Samoa, ae na matua lelei ona la a'oa'oina o la'u gagana Samoa.

Ou te manatu ai, o se tasi o fofo e mafai ona fai i le faafitauli ua tula'i mai i le gagana Samoa i a'oga i nei aso, o le saili lea o faiaoga e fiafia i le a'oa'oina o le gagana Samoa; e le manatu mama iai; ia 'aia ne'i manatu e faapea o le gagana Samoa o lana gagana na te iloa lelei ma o le mea lea e le tau a'oa'oina ai. Ou te talitonu o le mea lea e faigata lava ona faaulu i manatu o faiaoga, o le gagana Samoa, o se mataupu e tataua ona a'oa'oina lelei e pei lava o isi mataupu.

Ia amata i a'oga tulagalua ona aoaoina le gagana Samoa, se'ia oo i le Tausaga Sefulutolu (Yr. 13), ae tuu le aganuu se'i oo i le Iunivesite. O le aganuu e tele lava ina faato'a aoga pe a matutua tamaiti ma o i le faa-taulele'a poo le maota fonu o le nuu, poo le maota foi o le

faifeau e folafola ai toona'i ma mea faapena.

Amata mai i upu ta'itasi, faasolo atu i fuaiupu, poo le a le mea e ta'u o le fuaiupu, ma le su'iina faatasi o fuaiupu e faamatala ai se mea, o le amataga lava lea o le tusiina o se tala.

O se faata'ita'iga: O upu -

A'e, 'a'e, 'avi'i, tamoe, lele, pu'e, po, ofaga, toloa'i, 'apa'au, gutu.

O fuaiupu ua su'isu'i faatasi ma maua ai le tala, e pei o le faaaoaoga lenesi:

Ua oso a'e le la. Ua te'a ai le pogisa o le po. Ua savali atu le tama ua 'a'e i le la'au. Ua gau le lala o le la'au. Ua pa'u le tama i lalo. Ua 'e'e leo tele ma valaau i lona tina, "Mileta, sau. Ua 'ou pa'u i le la'au. Ua gau lo'u lima."

O le avii le igoa o le pa'a o le matafaga. E vave lana tamoe. A o le tuli o le manulele e su'e mea'ai i le matafaga. O le matafaga e leai ni maa na o oneone. O ina e nonofo ai 'avii o latou lua. E faigofie i le avii ona 'eli lona lua i le oneone. E fiu le tuli e tuli, ae vave ona oso le avii i lona lua. Ma faatalitali ai se'i alu le tuli, ona toe tolotole mai ai lea i luga.

Fai mai le tala a le tuli, "Se avii, se sau. Sau ta ta'a'alo.

Ae tali mai le avii i lona pu, "Leaga e te pepelo. E te le fia taalo. E te fia 'aia a'u. Na ou vaai mai lava 'o 'e pu'ea i lou gutu umi si o'u tei, ma e lele ma 'oe i lou ofaga. 'Aua la e te pepelo mai ia a'u. Vaai i le mau pu lea ua leai ni avii o iai. Ua uma ona e 'aia!"

O le a'oga a Moresi ma Saronā na amata mai ai la'u taleni o le tusi tala pupuu - short story writing, i le gagana Samoa, ma faasolo atu ai i le gagana Peretania, ina ua oo i luga i a'oga mauaululuga.

Ma e ou te molimau atu i faia'oga, o la'u taleni lena, o le mafuaaga autu lea o le tele o atunuu o le lalolagi ua 'ou oo iai, ona o a'oa'oga na ou auai atu iai,

faaaau itulau e sosoo ai.

ITULAU MO TUPULAGA TALAVOU

E Maua Manuia pe a e lelei i le Gagana Samoa

pe valaauina foi au e faitauina nisi o a'u tala ua faaliliu mai i le gagana Samoa i le gagana Peretania. E pei ona valaauina mai a'u (faatasi ma le tama'ita'i o Momoe Malietoa von Riche), e le Commonwealth Institute i Lonetona, Peretania, ou te auai atu i le Pacific Week i lea nofoaga i le tausaga e 1988, e faitauina ai nisi o a'u tala. Na latou totagia lo'u pasese, ma la'u nofo ai i Lonetona i vaiaso e lua.

Afai tou te manatua a'u faasalalaua o a'u tala i le polokalame a le 2AP pe tusa o le 35 tausaga talu ai, ia o a'u tala na na mafua ai ona maua lo'u avanoa ou te alu ai i Hamburg i Siamani i le tausaga e 1990, le tausaga na malo ai Siamani i le Ipu o le Lalolagi i le taaloga o le Soka. Na ou iai i Hamburg i le aso na malo ai Siamani. Na fai le fiafia tele a tagata o Hamburg se'ia oo i le tusa o le 4am amata tapuni ai e leoleo le malae tele na fai ai. A o lea ua toe malo Siamani, ma ou manatua ai le aso na ou iai i Siamani i le tausaga e tele ua mavae. Ae na mafua ona ou iai i Hamburg ona o a'u tala sa faasalalau i le 2AP.

O le konesula o Siamani i Samoa nei, o le Samoa, sa fiafia e faalogologo i a'u tala i le polokalame o le Palolomua a le leitio 2AP. Ona ia aumai ai lea o le avanoa ou te alu ai i Siamani ma fai mai ia a'u, "E atili lelei ai lau tusitala pe a e alu e te matamata i le leitio faasalalau lea a Siamani." Na totagi uma e le malo o Siamani lo'u pasese o le alu ma toe sau, ma lo'u nofo i Hamburg i vaiaso e lua.

O se isi faamalosi mo outou faia'oga o le gagana Samoa, poo outou e fiafia i le tusi o tala i le gagana Samoa, e iai teuga tupe (funds), i Ofisa o Hai Komesina o Ausetalia ma Niu Sila, mo

se fesoasoani tau tupe e lolomi ai ni a outou tusi i le gagana Samoa. E fiafia tele latou e fesoasoani mai mo ni tusi i la tatou lava gagana, ae le o le gagana Peretania. O le tele o tusi ua ou lolomiina i le gagana Samoa, o tupe mai le "fund" i le Ofisa o le Hai Komesina o Ausetalia i Samoa, na faatupeina ai. O le "fund" lea, pei lava ua i lalo o le vaaiga a le Matagaluega o le Va i Fafu i le Ofisa o le Palemia i le taimi nei.

O la'u tusi muamua lava na lolomi i le "fund" lea, o le "Maunu mai Loimata o Apa'ula". Na lolomi e le Institute of Pacific Studies o le Iunivesite o le Pasefika i Saute i Suva, ma le Institute of Samoan Studies o le Iunivesite Aoa o Samoa, ae totagi i le fund lea a Ausetalia.

A lelei lau tusitusi i le gagana Samoa, e oo ina faatauina au tala e nisi ma latou lolomiina. E pei o la'u tala: "O le Taavale Atigi'apa" na faatau e le School Publications Branch o le Matagaluega o Aoga a Niu Sila ma faaliliu i le gagana Peretania ma faaigoa: "The Tin Can Car". E \$110 la'u tupe na maua i le faato'a faatauina o le tala. E tele ni tausaga ua te'a ae toe tusi mai Niu Sila pe mafai ona latou toe lolomia la'u tala lea. Na ave iai le faatagaga. O la'u tupe na maua mai, ua sii i luga, e sili i le \$1000! Mo si nei lava tama'i tala "O le Taavale Atigi'apa!" - "The Tin Can Car!" Sa lomina i School Journals a Niu Sila.

O la'u tala: "O le Ulugalii" - "The Couple", na faaoga e le Iunivesite o Aukilani ma latou lolomia i le gagana Peretania i le latou tusi: "O le Nuanua" na tuufaatasia e Professor Albert Wendt. O la'u tala, "Who's Playing Naked Now?" (Or, The Influence of Religion on Pacific Cultures), na

lolomi e le Iunivesite o le Pasefika i Saute i le latou tusi, "Pacific Perspective."

Ua ou tusia lenei tala ina ia silafia ai e faia'oga, e taua le gagana Samoa, ma e maua ai au tupe pe a e lelei ai. Ua lolomia foi lenei tala i le *Itulau mo Tupulaga Talavou*, ina ia iloa ai e tama ma teine a'oga, e aoga lou poto i le gagana Samoa. O le toatele lava o outou tou te manatu mama i le gagana Samoa i a'oga oloo outou iai. Ae a uma ona outou faitauina la'u tala lenei, ona outou iloa ai lea, e tele lava aoga o le gagana Samoa mo outou.

Mo a'u lava ia, ua ou oo ai i le tele o atunuu o le lalolagi. Ua tele foi a'u tupe ua maua ai, mai a'u tusi e lima ua lolomi ma faatauina atu. O tusi nei o tala pupuu na ou tusia, ma ua faaogaina i a'oga i Samoa: "Maunu Mai Loimata o Apa'ula", "E Vaetuli le Fale Samoa a o le Faasinomaga", "Never to the Sina Again", o le tala oloo faamatala ai le *Mata Laumei* a Leusoalii, Luatuanuu, o le nuu o o'u matua, ma o le nuu na ou fanau ai. Ma nisi o tala ta'uta'ua a le lalolagi na ou faaliliuina i le gagana Samoa e pei o le: O Fagogo Ta'uta'ua a le Lalolagi, O Malaga a Ulisesese, O le Perenise Fiafia, o Sinapati le Seila, ma isi. O nei tusi uma e le'i alu ai sa'u tupe e lolomi ai.

Mo soo se isi e fiafia i le tusitusi o tala pupuu i le gagana Samoa, faaputupu au tala; a oo ina tele ma ua lava ai se tusi, ona su'e loa lea o se tagata e lelei na te faitauina ma faatonotonu ma faitioina foi, ma toe faafo'i atu ia oe e toe tusi. Ia e fesili foi i le tagata lena pe faapefea ona faa-"tagata" au tala, ma fai ni mea ina ia tosina ai tagata e faitau.

A uma lena, ona su'e loa lea o se mea e maua mai ai se tupe e lolomi ai, pe afai e leai sau tupe e lolomi ai. A uma ona lolomi, ona e alu loa lea i le faatau ae maua mai ai au tupe.

E mana'omia tele e a'oga i Samoa ni tusi o tala pupuu i le gagana Samoa, ni tala e malie i le faitau ma fiafia iai tagata. O le mea aupito taua lava lea. Ia e tusi ni tala e te talitonu e matua fiafia tagata e faitau. O lau maketi muamua lena, faapea ma le anoano o tagata Samoa oloo i Niu Sila.

Afemata T. Apelu Aiavao

O le Alofa o le Faasinomaga lea o le Ekalesia

**Saunia mo le Fono Tele 2014 e Fuimaono Tuiloma F. Alolua T.T.
Matagaluega Aukilani, Niu Sila.**

A o le'i faia se manatu e tusa ai o le Manatu Autu o le Fono Tele o lenei tausaga, e fia faaleo muamua le agaga faafetai ona o le avanoa taua ua tuuina mai i lou nei tiakono faatauavaa ma le le auga e faia ai se pepa.

Sa le'i faigofie i se manatu a o ni lagona ua tutupu a'e, ina ua vaai i le Manatu Autu ua tuuina mai, ona e loloto ma lautele lenei mataupu. Ua faatula'i mai ai foi se fesili - Pe aisea ua faatauaina ai e le EFKS i lenei Fono Tele, lenei Manatu Autu?

E le fesiligia le tofa i le Susuga i le Failautusi Aoa ma le filifiliga o lenei Manatu Autu mo le Fono Tele, ae o le a aga'i se manatu poo le vaai a le tiakono poo le tagata lotu i lenei mataupu.

O le a le oo lava se lagona i le itu faaleagaga poo le Mataupu Silisili e uiga i le alofa, o lea oloo susu le aufaigaluega tofofi a le Atua o la latou matafaioi lea. E avatu foi vai malu, a o le a se silasila ma se faafofoga, o manatu lava o lo'u nei tiakono poo le tagata lotu ma lana vaai i le Manatu Autu.

Afai o le alofa o le faasinomaga lea o le Ekalesia, poo le a tonu le mea oloo ave iai le faamamafa - O le alofa o le Ekalesia i tagata lotu, poo le alofa o tagata lotu i le Ekalesia. A o se vaivaiga o le fai pepa lava ia, e tatau ona ave le faamuamua ma le faamamafa o le alofa o le Ekalesia i tagata lotu.

Ua 43 nei tausaga talu ona pale mai i le tofi tiakono, oloo galue pea ma tulimata'i galuega a le Ekalesia. E leai foi se agaga e toe feau ma toe tolaulauina ni auaunaga ma ni tautua le 'a'u'a'u ua faia mo le Ekalesia e tagata lotu. E leai se mea lilo i le silafaga a le Atua. E leai foi se manatu i tagata lotu e taui mai e le Ekalesia se alofa poo se galuega ua faia mo le Ekalesia, faitalia le Alii.

O le upu filifilia mai le Tusi Paia mo lenei tausaga, a o saunoaga lava a lo tatou Alii: "E le sili lava le alofa o se tasi i lenei alofa, ia tuuina atu e se tasi

lona ola mo ana uo." Afai o Keriso le Ao o le Ekalesia, poo ia lava o le Ekalesia, o lona uiga la e le'i maliu Keriso mo ia lava poo le Ekalesia, ae na maliu mo oe ma a'u le tagata lotu. O fesili lava e ono faatula'i mai - O o gatasi le alofa lea o Iesu ma le alofa o le Ekalesia i ona tgata? O le uiga ea o afioga nei a Iesu, ia tuuina atu o tatou ola mo le Ekalesia, o le alofa moni lea? Poo le tuuina atu o le ola o le Ekalesia mo ona tagata lotu, o le alofa moni lea?

A vaai i le atina'ega o le Ekalesia i lona itu i le tino, e taua ana atina'e ma ana aseta. A o le manatu o le fai pepa lava ia, e leai ni aseta sili ona taua nai lo tagata lotu se'i tulou. A leai ni tagata lotu, ua faaletonu foi le Ekalesia. O lea foi ua faatula'i mai nisi o galuega tetele a le Ekalesia, le toe faafouina o le Ioane Viliamu ma le toe fausia o le Iupeli. E faalagolago lava nei galuega uma i le soifua o tagata lotu. O le lipoti a le Matagaluega o Fuainumera Faamaumauina e tusa ai ma le Tusigaigoa talu ai a Samoa, ua aliali ai le pa'u i lalo o le fuainumera o tagata lotu EFKS. E le iloa foi e le fai pepa poo le a le mafuaaga. Ua na o se faamanatu, ae atonu e faatupu manatu i le Ekalesia. E malu lava le alala, ae vevela le ta'inafi se'i tulou. E taua le anofale ae le o le fale.

O le Ekalesia o le tina lava lea o tagata lotu poo aulotu. E iai taimi ua moomia ai e aulotu le alofa faa-tina o le Ekalesia, ua fia maua se fesoasoani

ma se lavea'i. Afai e lagona e aulotu ma tagata lotu le mafanafana o le alofa faa-tina o le Ekalesia, ona faataualofa lea. E tatau foi i le tagata lotu ona alofa i le Ekalesia. E le mafai ona faaitiitia le agaga faafetai i le Ekalesia, ona o le alofa ma le fesoasoani i e ua fia maua se lavea'i. Ua manatu ai le fai pepa, ai o le alofa lea ua faatau i lenei Fono Tele, poo le faasinomaga foi lea o le Ekalesia.

Ua tele aulotu ua fevaevae'i ma ta'ape'ape. Afai o le faifeau o le sui vaai o le Atua poo le EFKS, e tautala ma le faaaloalo, poo moni le alofa o le faifeau i le aulotu poo alofa lava ia ia te ia lava? E mafai foi ona fesiligia, poo moni le alofa o le aulotu i le faifeau?

O le taofi o le fai pepa lava ia, e ala ona tutupu le mau faafitauli i totonu o aulotu, o le le femalamalama'i ma le le galulue faatasi, a ua fai pitotasi le galuega. E oo lava i tupe, ua le malamalama ma faaoga sese, ua aunoa lava ma se alofa. E manatu o le isi lea mafuaaga ua ta'ape ai tagata ma fultua mai i le EFKS. O le alofa o le Alii e sili lava lea.

E faamalulu atu, afai e iai se gagana ua sala, poo se faamatalaga ua le tau tamalii, faamolemole faamagalalo le auauna. Ia iai pea le filemu ma le manuia o le Atua, a o faagasolo tualumaga o le Fono Tele o lenei tausaga. Soifua.

Christ of the Andes

The Christ of the Andes statue, standing on the Chile-Argentine boundary line symbolizes a pledge made by the two countries. As long as the statue stands, it was agreed, there shall be peace and goodwill between Argentina and Chile. But ironically enough, the statue itself was the cause of what almost resulted in open conflict. When the work was completed, someone pointed out that the Savior's back was toward Chile. Chileans felt they had been slighted. But while indignation was at its height, a Chilean newspaper man saved the day. In an editorial he explained: "The Argentinians need more watching over than the Chileans." This satisfied the people. They laughed goodnaturedly - and went back to their daily tasks.

O E UA MALILIU

Lefuenatogi Laki Masealii

4 Me 1939 - 20 Mati 2014



O le alii tiakono na soifua mai i le aso 4 o Me 1939, ae faamanava e le Atua ana galuega i le aso 20 Mati 2014.

O ona matua o Masealii Saseve ma Kalala F. Masealii. Sa faaipoipo atu i le tina ia Filipina

Laulu. E to'afitu lana fanau, ma fanau a lana fanau e 37, ma fanau a fanau a fanau e to'atolu. E to'atolu ona uso, ae to'afa tuafafine.

Sa galulue i lo la tofi tiakono i Vaiee. Na malaga mai i Apia nei, ma amata ai loa le matou mafutaga i le aso 10 Aperila 2011.

O se tama e aga malie, e fai tala malie. Talu ona matou mafuta ma lenei tama, e le misi i se mea e fai, e oo lava i galuega a le Mafutaga a Tina, e iai foi ma lenei tama.

O ia sa faa-tama iai le Autalavou; sa aufaipese foi. E mafuta tele mai Lefuenatogi i le faifeau, e tausi faifeau foi. O se tama sa tele foi lona sao i galuega fai a le Ekalesia.

Sa faia lona sauniga faaleaiga i le fale maliu o Sefo. O ona toe sauniga sa faia i le Ekalesia nei. Sa ou taitai, sa faaulufaleina lona

sa e Alesana Ainuu, A'oa'o I'u mai Malua, ma faitauina le Tusi Paia; o le tatalo na saunia e Irenio Tagaloa FS.

Na molimau le tina ia Filipina i le la mafutaga; o Eseta Purcell o lona afafine sa molimau e fai ma sui o le fanau; o lona tuafafine o Pa'upa'au sa fai ma sui o le aiga; a o a'u sa saunia lona molimau faaleagaga.


Ona ou faaiuina lea o ona toe sauniga i lona nofoaga mau i lona aiga i Maugafiafia lava.

Amuia lea auauna, ua maua mai e lona Matai oloo faapea ona fai. Tofa Lefuenatogi. E le mafai ona galo oe i le Ekalesia.

Setu Samitioata FS,
Maugafiafia,
Vailele.

Leulua'ialii Faalava'au Ituau Mu Puletua

10 Oketopa 1943-28 Oketopa 2012



Faaipoipo: 1979 ia Alafaga Auvae Faalavaau TK.

O le poutu toa o le galuega a le Atua, sa faalagolago i lana tōfā fa'a-ao sina le faagāsologa o feau ma tiute o le aiga a tiakono. O se tamā lava ua “*ta'uleleia ma tumu i le Agaga Paia ma le potō*” e pei o agavaa na saili ai ulua'i tiakono a le ulua'i Ekalesia.

O lona Sauniga Faale-Aiga sa faia i le malumalu tapua'i o le “Nofoa o le Alofa” i le aso 4

Novema 2012, o se tasi fo'i lea o galuega o loo fai ma pine faamau o le tautua a Leulua'i ma Alafaga. Na 'ou ta'ita'i, ae faaulufale e Nuuasala Cowley FS le sâ, ma faia le tatalo, o le Tausi Matagaluega ia Rev Faleupolu Ta'ulelei sa faitauina le Tusi Paia, o Apisaloma Ta'eleipu FS sa lauga, ma 'ou fono faaipii.

O ona toe sauniga i le aso 5 Novema 2012, sa ta'ita'iina e le Toeaina Faatonu Peleti. Toailoa FT ma le Pulega a Leulua'i, i Sini i Mâtû. O a'u na faaulufaleina le sâ, faitau Tusi Paia Pua Tima FS, tatalo Iosefa I'uvale FS, lauga Elama Alao FS ma toe faaopoopo le ta'ita'i. O a'u na faia le sauniga i le Crematory i Pine Grove.

E to'alua ona alo na filifilia i le NRL mo le 'au a Penrith Panthers. O le tasi ua fa'auau le taumafai i lea lava fa'aâgatama i Peretania (Tony), a o le isi o loo galue pea i le Matagaluega o le NRL i Ausetalia (Frank). Sa filifilia fo'i i la'ua i le Toa Samoa.

O le tasi mitamitaga o Leulua'i, o nai ona aiga o loo fai ma taulaga soifua i le galuega a le Atua. O lana taleni le musika, kitara, mandolin, piano, e pa'i mâtû i le faafofoga. E le gata o le fai pese, a o le Ta'ita'i Pese o le aufaipese mai lava i le amataga o lenei galuega. O ia o se tasi o toe ulu taia o le Pulega ma le Matagaluega Niusauelese. O se tamâ ua talitonu i le faamanuiaga a le Atua i lona soifua ma si o la aiga, o lea sa augofie ai i le galue faaletuâ'oa mo le finagalo o le Atua. E fai mo ia le fale o le faifeau, e ui ina loa le soifua, ae na te le'i tuulafoa'iina le auauna a le Atua. O le mâ mafutaga ma Leulua'i, ou te le iloa pe galo afea.

Filipi 3:20 “*A o lo tatou nuu moni ua i le lagi lea, o loo faatalitali mai ai i tatou e le Faaola, o le Alii o Iesu Keriso*”.

Rev. R. Gafoaleata Faitua-Tagaloasa FS
EFKS Penrith